



25. januar 2011  
12. august 2010

UPA 2011/23  
UKA 2010/67

Inatsisartut Suleriaasianni § 35 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Meeraq qiteralugu, meeqqallu isumaannaatsuunissaa qiteralugu angajoqqaat akissussaanerat pillugu inatsimmik oqaasertalersuinissaq pillugu apeqquteqaat aallaavigalugu oqallinnissamik siunnersuut.**  
(Inatsisartunut ilaasortaq Astrid Fleischer Rex, Demokraatit)

### **Tunngavilersuut**

Demokraatini upperaaput, inuit ataasiakkaat pisinnaasatik sipporlugit iliuuseqarsinnaasut. Aamma upperaaput, inuup kialluunniit nammineq inuunini inooriaatsinilu sapinngisamik annerpaamik akisussaaffigisinnaagai.

Angajoqqaanngortussarpasuit, pissusissamisuuginnartumik ilisimaneq ajorpaat meerartaarnermut atatillugu suliassaq akisussaaffillu qanoq angitigisut misigisussanngornerlugit. Angajoqqaanngorlaarpasuit ilisimaneq ajorpaat namminneq pisortallumi akisussaaffii suunersut. Nammineq aalajangertarparput meerartaarniarluta, taamaattumik Demokraatini isumaqarpugut, Kalaallit Nunaanni innuttaasut tamarmik ilisimasariaqaraat, ilaqquttaminnut sualummilluni meeqqaminnut qanoq akisussaaffeqarnerlutik.

Demokraatini isumaqarpugut, politikerit isumagisassarigaat, inuiaqatigiit qanoq ilusilersornissaannut sinaakkutissanik aalajangersaanissaq, tamatuma kingorna inuiaqatigiit immersuissapput sapinngisartik naapertorlugu. Taamaattumik Demokraatini suleqataarusuppugut angajoqqaat akisussaaffeqarnerat pillugu inatsimmik sinaakkusersuinissamut, inatsimmi ersarissumik allaaserineqassapput angajoqqaat ataasiakkaat akisussaaffii aamma qaqugukkut pisortat akuliunnissaat naatsorsuutigineqartassanersoq. Sulissutigisariaqarparput angajoqqaat nukissallit pilersinnissaat.

Meeqqap iluaqutissarnissaa pingaarnepaasussaavoq. Taamaattumik angajoqqaat pingaarnertut akisussaaffigaat, meeqqat peqqillutik, toqqissisimallutik nukittullutillu peroriartornissaat.

Aatsaat angajoqqaat sumiginnaappata inuiaqatigiit akuliutissapput inuiaqatigiinnilu sanngiittortat – meeqqat ikiortariaqalersimasut ikiorlugit.

Demokraatini upperaaput, meeraanermi toqqissisimanerup meeqqat ingerlalluartunngortittaraat, ataqqinartutut pingaartinneqartutullu misigisimasut. Taamatut pitsaasunik piginnaasaqarnerup inuit inuiaqatigiillu pitsaanerpaamik ikorfartoqatigiissinnaanngortissavai, ineriartornermilu ikioqatigiisillugit. Demokraatini upperaaput, tamanna inuiaqatigiinnut ingerlalluartunut pissarissaartunullu aqutaasoq.



Angajoqqaat akisussaaffii pillugit inatsimmi takorloorparput oqaasertaliunneqassasoq, angajoqqaat tassaasut meeqqat ulluinnarni toqqissisimallutik, aalajangersimasunik sinaakkuteqarlutik asaneqarlutillu peroriartornissaannut akisussaasut. Angajoqqaat aamma isumagissavaat meeqqat angerlarsimaffeqarnissaat, peqqinnartunillu avatangiiseqarlutik peroriartornissaat.

Soorunami tamatuma kinguneranik peqqinnartunik nerisaqartinneqassapput eqqortunillu atisaqarlutik, meeraq qiulerani peqqisooqqullugu. Tamakku saniatigut angajoqqaat aamma akisussaaffigaat meeqqat atuarnerini tapersersussallugit, meeqqat meeqqat atuarfiannik pitsaassumik naammasinnissinnaaqqullugit, meeqqap piginnaasai tunngavigalugit. Meeqqat ullut tamaasa atuakkerinerminni ikiorneqartassapput.

Paarlattuanik pisortat akisussaaffigissavaat, qulakkiissallugu, meeqqat pitsaasunik avatangiiseqarnissaat soorlu ullutsinnut naleqquttumik atuarfeqarnissaat, meeraaqeriveqarnissaat, meeqqeriveqarnissaat allanillu ullutsinnut naleqquttunik paaqqinnittarfeqarnissaa. Alla immikkoortoq pisortat qulakkiigassaat tassaavoq ingerlalluurtumik peqqinnissaqarfeqarnissaq, sanngiinersat pisariaqartitsinertik naapertorlugu katsorsartiffigisinnaasaannik. Tamatuma saniatigut soorunami pisortat aamma piareersimassapput ilaqutariinnik ajornartorsiortunik aningaasatigut ikiorsiinissaminnut.

Angajoqqaat akisussaaffii pillugit inatsit imatut oqaasetalersorneqassaaq, Meeqqap Pisinnaatitaaffii pillugit Naalagaaffiit Peqatigiit isumaqatigiissutaanni aalajangersakkat siunertallu malinneqartussanngorlugit.

Ullumikkut pissutsit assigiinngitsut pissutigalugit meerarpasuit paaqqinnittarfinnut angajoqqaarsianullu inissinneqartarput. Demokraatini isumaqarpugut ilaqutariit namminneq piumassutsiminnik meeqqamut toqqissiviillioortumut angajoqqaarsiannngortartut nersortariaqartut. Taakku ikiuuttanngitsuuppata akisoqisunik amerlanernik meeqqanut angerlarsimaffiortoqartariaqarsimassagaluarpoq. Inuttut aningaasaqarnikkullu meeqqat sumiginnakkap ilaqutariinnik nukittuunit paarineqarnissaa pitsaanerummat, pitsaassagaluaqaat taakku atugaat pitsanngorsarneqartuuppata, taamaalippat ilaqutariit amerlanerusut nammaqataanissartik kajungerinerulissammassuk.

Demokraatini meeqqat atugaat pitsanngorsarniarlugit suliniutinut nutaanut allanut tapersuinissatsinnut aamma piareersimavugut.

Taamatut oqaaseqarlunga oqallittoqarluarnissaa kissaatigaara aamma Naalakkersuisut akissutissaannut taamatullu partiit allat oqaaseqaatissaannut qilanaarpunga.